

Texto presentado pola CIG-Autónomica aos grupos PSOE, AGE, BNG e Grupo Mixto do Parlamento de Galiza o 28/09/2015. O PP non nos recibiu.

Proposición de Lei de derogación de medidas temporais en determinadas materias do emprego público da Comunidade Autónoma de Galiza.

Exposición de motivos

A resposta dos poderes públicos á crise económica caracterizouse pola imposición de grandes sacrificios aos empregados públicos, en aras ao obxectivo gubernamental da redución do déficit público. Estes sacrificios adoptaron as dolorosas formas de recortes salariais, deterioro das condicións de traballo, aumento de xornadas ou ausencia de reposición dos efectivos necesarios para a prestación dos servizos públicos.

Os esforzos realizados polo persoal das administracións públicas e do resto do sector público non foron demandados na mesma medida a outros colectivos con maior capacidade económica, o que contravén o principio de igualdade na súa dimensión de proporcionalidade, por acarretar un sacrificio desorbitado para un concreto sector da poboación. Así o recoñeceu, en semellante tesitura, o Tribunal Constitucional da República Portuguesa.

No noso caso, mediante a Lei 1/2012, do 29 de febreiro, de medidas temporais en determinadas materias do emprego público da Comunidade Autónoma de Galiza, acordouse a suspensión de dereitos recoñecidos en normas de carácter legal ou convencional, atendendo á *«grave situación orzamentaria e a necesidade de reducir o déficit público»* e con carácter *«temporal, polo que a súa vixencia queda supeditada á subsistencia das difíciles circunstancias económicas que afectan a sustentabilidade das contas públicas»*. De feito, a disposición derradeira única da Lei establece que *«as medidas previstas nesta lei serán revisadas nun prazo de dous anos dende a súa entrada en vigor, en función da evolución do produto interior bruto real de Galicia e do aforro primario dos orzamentos»*.

Pasaron xa máis de tres anos desde a entrada en vigor da Lei e, incumprindo o mandato normativo, a Xunta de Galiza non mostrou a menor intención de revisar as gravosas medidas, que se chamaron temporais e levan camiño de se tornaren definitivas.

Porén, as valoracións públicas do Goberno sobre a evolución da situación económica de Galiza móvense entre o aberto optimismo e a euforia contida. No propio ano 2012, o presidente felicitábase de que: *«a Xunta xestionou as contas públicas con realismo, rigor e eficiencia orzamentaria para que hoxe Galicia sexa a comunidade con menor déficit de España»* (nota de prensa do 25 de outubro de 2012). O 31 de xullo de 2015, outro comunicado oficial afirmaba que:

Texto presentado pola CIG-Autonómica aos grupos PSOE, AGE, BNG e Grupo Mixto do Parlamento de Galiza o 28/09/2015. O PP non nos recibiu.

«o teito de gasto para 2016, cun incremento do 5,2%, permitirá volver baixar impostos, seguir devolvendo aos empregados públicos o esforzo feito e mellorando os servizos públicos, e impulsar a actividade económica». Moi recentemente, na información enviada aos medios tras o Consello da Xunta do 17 de setembro de 2015, anunciábase que «a solvencia de Galicia ten como consecuencia que a Xunta estea en condicións de adiantar a devolución doutro 25% da paga extra a este 2015 porque ten dispoñibilidade orzamentaria e porque vai cumprir neste exercicio o obxectivo de déficit».

Resulta paradoxal que o mesmo Goberno que de forma tan expresiva proclama a recuperación económica e a solvencia da nosa Comunidade Autónoma manteña unha suspensión de dereitos dos empregados e empregadas públicas que foi xustificada no seu momento pola concorrencia de difíciles circunstancias económicas que afectaban a sustentabilidade das contas públicas. Procede, polo tanto, a derogación pura e simple daquelas inxustas medidas.

Texto articulado da proposición de lei

Artigo único.

Fica derogada a Lei 1/2012, do 29 de febreiro, de medidas temporais en determinadas materias do emprego público da Comunidade Autónoma de Galiza.

Disposición derradeira única.

Esta lei entrará en vigor ao día seguinte da súa publicación no *Diario Oficial de Galiza*.